

SECONDA SESSIONE URDINARIA DI U 2023
RIUNIONE DI I 30 DI NUVEMBRE E DI
PRIMU DI DICEMBRE DI 2023

2EME SESSION ORDINAIRE DE 2023
REUNION DES 30 NOVEMBRE ET PREMIER
DECEMBRE 2023

2023 / 02/077

**REPONSE DE MONSIEUR LE PRESIDENT DU CONSEIL EXECUTIF A LA QUESTION DEPOSEE
PAR MONSIEUR SAVERIU LUCIANI AU NOM DU GROUPE AVANZEMU**

Objet : 2023 : aspettendu u CPER, u corsu a sicutera ?

Sgiò Cunsiglieru, vi ringraziu.

Circaraghju à risponde, ben ch'ùn sia micca sicura ch'ella ùn conti di più per voi a vostra quistione chè a mo risposta. Hè sempre appena u casu.

Di modu generale, in 3 simane ete dettu trè volte pubblicamente chì u Cunsigliu esecutivu è a magiurità eranu incumpetenti. L'ete detta una prima volta di modu generale, una seconda volta pè l'affare di l'aeriu è una terza volta ...pè a lingua.

Eiu ùn aghju micca da fà pulemica cun voi. U cartulare di a lingua u cunniscite bè, chì site statu incaricatu durante 6 anni di sta quistione strategica.

È sò un pocu surpresu di a tunalità generale, al di là di e nostre difficoltà pulitiche, a tunalità di a vostra quistione, postu ch'è no simu attualmente in u mantenimentu è a cuntinuità di a pulitica iniziata in u 2015, di modu cullettivu, è erate, in modu cullettivu, incaricatu di mettela in ballu è tandu vi convenia bè è più chè bè.

Dunque, simu attempu in u mantenimentu è in u rinforzu. U rinforzu, ch'ella sia annant'à u fondu o nant'à i sciffri. Dunque ùn capiscu micca troppu, o capiscu troppu bè, a vostra stizza.

Circaraghju à risponde di manera appaciata, perchè pensu chì, cum'è pè u restu, a lingua hà bisognu di pace è di ricircà ciò chì ci pò fà viaghjà inseme è micca ciò chì ci pò spiccà.

Nantu à l'affare di u CPER, a sapete, ùn aghju micca da fà a storia di u CPER nè di e rilazione cù u Statu, ma vogliu paragonà quantunque ciò chì si passava nanzu è ciò chì s'hà da passà ind'u novu CPER. Aviamu cuminciatu u niguziatu à tempu vostru, aghju circatu à mantene, cun l'astri, è à allargà. Ind'è u CPER di prima, eramu à 17 milioni d'eurò pè a lingua corsa è ind'è quellu novu ch'è da vene avà cù u niguziatu, emu da passà à 31 milioni. Dunque, una crescita da 17 à 31.

Què hè u primu affare.

Secondu affare, u sforzu maiò di 'ssa crescita ùn hè da a parte di u Statu, hè fattu da a Cullettività di Corsica. A regula di basa, a sapete, in u Cuntrattu di Pianu trà u Statu è e Regione (quì ramentu chì ghjè un attrazzu generale chì si mette in piazza in tutte e regione è ci n'hè unepoche ancu in Francia ch'ùn anu ancu signatu), ghjè un finanziamentu à paru. In u duminiu di a lingua corsa simu à 63 di a parte di a Cullettività è pè 37 di u Statu. Dunque ghjè, attempu, una crescita glubale, vulsuta da a nostra parte, imposta in u quattru di u niguziatu è finanziata cù i nostri soldi.

Ùn voltu micca nantu à u fondu, u cunniscite : sustegnu à l'immersione, sustegnu à a piazza di u corsu inde l'insignamentu, e convenzione cun tutti l'attori, i media è u restu.

Per ciò chì tocca à a valutazione di a nostra pulitica, a sapete bè ch'ella hè difficile d'ottene i sciffri di u Retturatu, l'avete ramintata, aviamu vistu u Rettore è i ministri è diciamu ch'ùn eramu d'accordu cù i so sciffri è ch'è no vuliamu cuntrastà nantu à u ritornu nantu à investimentu inde u settore di a lingua corsa inde u sistema educativu. Emu mandatu, hè vera, in u 2021, una convenzione da zifrà incù u Retturatu, da mette in ballu una metudulugia nantu à u cunfrontu nantu à i sciffri. Ùn hè micca stata zifrata, l'aghju ramintata à u Rettore è face parte di u nostru niguziatu attuale.

Attualmente, ùn hè micca solu l'affare di u CPER, ùn hè micca l'affare di u Raportu d'orientazione. Sapete quantunque chì u Raportu d'orientazione hà permessu di sbuccà nantu à riunione cun tutti l'attori di terrenu, cù a partecipazione di e cummissione, tutte e cummissione chì anu travagliatu nantu à u fondu, chì anu permessu di riattualizà a nostra visione di a piazza di a lingua, per sbuccà nantu à una vera pulitica linguistica è issu travagliu glubale ch'è statu fattu, iniziatu in u 2015, cunfruntatu à l'upposizione di u Statu durante annate è annate, a sapete, oghje hà vucazione, prima, à sbuccà in i mesi à vene nantu à un dibattiru, dopu à u raportu d'orientazione un dibattitu cun pruposte, è tinaraghju contu di quelle di l'attori di terrenu.

Avete dettu nanzu : « assai fume è pocu arrostu ». Per cuntinuà nantu à a cucina, casca cum'è u furmagliu nantu à e lasagne 'ssu raportu à vene, perchè emu avà a pussibilità, spergu, cù u pruceddu nantu à l'autunumia, di sbuccà nantu à un statutu di a lingua corsa chì sia per noi quellu di a cuufficialità, chì sia quellu di una vera pulitica linguistica inde tutti i duminii. Emu avutu (ne parleremu dopu) una riunione chì mi si pare assai custruttiva, di a Cummissione di i presidenti, nantu à l'armunizazione di e nostre pusizione.

Dunque ùn simu micca suddisfatti di l'acquisti, per oghje, ma circhemu è pensemu chì, nantu à què ommancu è forse, spergu, ancu nantu à u restu, nantu à i scopi, nantu à l'andatura, nantu à a vulintà di mette à u core di e nostre primure, a lingua corsa chì face populu, nazione è paese per quelli chì sò nati quì è quelli chì ci ghjunghjenu, pensu ch'è no seremu d'accordu è pensu ch'è no pudaremu benefizià di e vostre cumpetenze è di a vostra vulintà in u quattru di i nostri travagli à vene. »